
PROPOSICIÓN DO GRUPO MUNICIPAL DE COMPOSTELA ABERTA PARA QUE SE ABRA O NOVO CENTRO CÍVICO DA CIDADE VELLA SITUADO PRAZA DE SALVADOR PARGA CANTO ANTES

O Grupo Municipal de Compostela Aberta, ao abeiro do regulamento orgánico municipal do Concello de Santiago, presenta a seguinte proposición para o seu debate no Pleno. O proxecto do acordo procura dar resposta a unha demanda histórica da veciñanza da cidade vella procurando que o novo centro sociocultural deste ámbito entre xa en funcionamento no próximo outono xunto coa nova programación da rede de CSC.

EXPOSICIÓN DE MOTIVOS:

A zona histórica e monumental de Santiago é o corazón da nosa cidade, e por iso debe ter un trato especial, mais non só do punto de vista da conservación patrimonial senón tamén na dotación de equipamentos e facilidades para vivir nela, como en calquera outro barrio de Compostela. Neste sentido, e entendendo que a cidade vella non pode ser un parque temático de uso exclusivo para o turismo, no anterior mandato deseñouse e aprobouse un proxecto de rehabilitación do local da praza de Salvador Parga para convertelo no futuro centro cívico da cidade histórica. O proxecto foi deseñado atendendo ás demandas da veciñanza, dos técnicos de centros socioculturais, e contando tamén coa opinión da propiedade do inmovible, neste caso Afundación, e quedou aprobado en Xunta de Goberno do 20 de xullo de 2018 cun orzamento máximo de licitación dalgo máis de 280.000 euros e un prazo de execución de tres meses. Posteriormente, este proxecto foi incluído no proxecto de orzamentos de 2019, que foi tumbado e non aprobado polo PP, PSOE e BNG en decembro do 2018.

A demanda deste centro é unha antiga reivindicación da veciñanza da zona vella, por iso o goberno de Compostela Aberta quixo deseñar un espazo que fose acaído para o uso sociocultural, localizándoo na parte baixa do nº 4-5 da praza de Salvador Parga, que albergaba a antiga biblioteca da cidade histórica. O proxecto deseñado permitía que o local conte cunha zona de recepción, oficinas, aseos, sala de lectura, aulas polivalentes e sala multiúsos. Tamén prevía o acondicionamento do xardín posterior do inmovible e a construción dunha pequena rampla que comunicará co xardín do Pazo de Amarante.

Tendo en conta que no 2019 non podería construírse este centro, por non ter os orzamentos de 2019 viabilizados, o goberno anterior aprobou o 17 de abril de 2019 un texto dun convenio coa USC co fin de poder dispor do uso da edificación de Casas Reais denominada Casa de Elisa e Jimena Fernández de la Vega, polo prazo de 25 anos, para localizar nela o novo Centro Cívico da Cidade Vella. Convenio que foi reclamado no Pleno de xullo de

2019, mediante unha proposición en Pleno presentada por Compostela Aberta, mais que non foi levado adiante polo goberno do PSOE e Sánchez Bugallo.

Chegados a este punto, na negociación de orzamentos de 2020, a primeira das demandas de equipamentos que presentou Compostela Aberta foi novamente a construción deste Centro Sociocultural, executando o proxecto en Salvador Parga posto que o goberno pretendía abrir a nova Oficina da Cidade Histórica no inmoible e Casas Reais. Finalmente non foi ata o 29 de setembro de 2021 que o actual goberno adxudicou e asinou o contrato de inicio. Aínda este mes adxudicouse a instalación dunha rampla de granito para mellor o acceso ao que será o novo centro sociocultural da zona vella.

Así pois, tendo en conta todo o anterior, a finalización das obras que tres anos despois por fin están executadas e, sobre todo, a necesidade de dar resposta a unha xusta demanda veciñal, o Grupo Municipal de Compostela Aberta presenta á consideración do Pleno o seguinte

ACORDO:

O Pleno insta ao correspondente órgano do Concello de Santiago a:

- 1. Que se dote de recursos e materiais o novo Centro Sociocultural da Cidade Histórica, situado na Praza Salvador Parga, para que entre en funcionamento o antes posible, idealmente xa nos meses de setembro e outubro co comezo da nova programación da rede de CSC de Santiago.**
- 2. Establecer as necesarias canles de diálogo e comunicación e participación coa veciñanza da zona histórica e co tecido asociativo -veciñal, cultural, deportivo e xuvenil- para que sexan partícipes no deseño da programación das actividades e tamén dos usos do novo Centro Sociocultural da Cidade Vella**

Santiago de Compostela, 14 de xullo de 2022

Branca Novo Rey
Concelleira do Grupo Municipal de Compostela Aberta

AO ALCALDE DO CONCELLO DE SANTIAGO DE COMPOSTELA